



# The Holy See

---

PAULUS EPISCOPUS

SERVUS SERVORUM DEI

**AD PERPETUAM REI MEMORIAM CONSTITUTIO APOSTOLICA CARACENSIS**

(*GUAIRIENSIS*)\* DETRACTO QUODAM TERRITORIO AB ARCHIDIOECESI CARACENSI, NOVA DIOECESIS  
CONDITUR «*GUAIRIENSIS*» NOMINE. Cum summus Deus misericordi consilio voluerit Nos ad Romani pontificatus  
Solum attolli atque Ecclesiae sanctae tractare gubernacula, omnibus idcirco viribus contendimus ut quae in Ecclesiae  
bonum atque utilitatem cedere intellexerimus, eadem, nulla interposita mora, faciamus. Quam ob rem cum venerabilis  
Frater Noster Iosephus Humbertus S. R. E. Cardinalis Quintero, Archiepiscopus Caracensis, audita Conferentia  
Episcopali Venetiola, in sui populi bonum petierit ut e sua archidioecesi nova dioecesis conderetur, Nos, de sententia  
venerabilis Fratris Felicis Pirozzi, Archiepiscopi titulo Gratianensis, et in Republica Venetiola Apostolici Nuntii, Nostra  
apostolica potestate haec quae sequuntur decernimus atque iubemus suppleto, quatenus opus sit eorum interesse  
habentium vel habere praesumentium consensu. E territorio archidioecesis Caracensis civilem regionem seu  
Departamento separamus, quam vulgo Vargas appellant, eaque novam dioecesim condimus *Guairensem*  
cognominandam, iisdem finibus circumscriptam ac regio e qua fit. Cuius novae dioecesis sedes atque Episcopi  
domicilium in urbe La Guaira ponetur, cathedra in templo Deo in honorem Sancti Petri Apostoli dicato collocabitur, factis  
nempe iuribus atque oneribus debitis, quae cathedralium templorum propria sunt. Constituta Ecclesia metropolitanae  
Sedi Caracensi suffraganea erit; in eaque Canonicorum collegium condatur, ad leges per alias Litteras apostolicas  
andas. Interim tamen Consultores dioecesani deligantur, qui Praesuli suo opera et consilio assint. Quod ad iuvenum  
institutionem attinet, qui ad Sacerdotium vocantur, serventur normae iuris communis, Sacrae Congregationis pro  
Institutione catholica atque decretum «*Optatam totius*» Oecumenici Concilii Vaticanii II. Cum vero iuvenes hi adoleverint,  
qui meliores fuerint Romam mittantur, in Collegium Pianum Latinum Americanum, theologia atque philosophia imbuendi.  
Mensam episcopalem efficient: populi collationes, Curiae emolumenta, congrua bonorum pars, si qua sint, quae novae  
Sedi obvenient, ad normam Canonis 1500 Codicis Iuris Canonici. Regimen constitutae dioecesis, cleri atque populi iura  
et onera, cetera huiusmodi, iure canonico temperentur. Acta denique et documenta dioecesim Guairensem respicientia  
ad eius Curiam diligenter mittantur atque ibidem religiose serventur. Simul ac nova haec dioecesis condita fuerit,  
Sacerdotes qui in eius territorio aut beneficium aut officium ecclesiasticum habeant, ei addicantur tamquam proprius  
clerus, ceteri clerci ac Seminarii tirones, ei in qua legitime degant. Ceterum hae Litterae Nostrae venerabilis Fratris  
Felicis Pirozzi cura ad exitum adducantur, vel eius quem ipse delegaverit; re vero acta, documenta exarentur, quorum  
sincera exempla ad Sacram Congregationem pro Episcopis cito mittantur. Hanc vero Constitutionem nunc et in posterum  
efficacem esse et fore volumus; ita quidem ut quae per eam decreta sunt ab iis quorum res est religiose serventur, atque  
igitur vim suam obtineant. Cuius Constitutionis efficacitati nulla, cuiusvis generis, contraria praescripta officere poterunt,  
cum per eam iisdem derogemus omnibus. Nemini praeterea haec voluntatis Nostrae documenta vel scindere vel

corrumpere liceat; quin immo huius Constitutionis exemplis et locis, sive typis impressis sive manu exaratis, quae sigillum viri praferant in ecclesiastica dignitate constituti simulque ab aliquo publico tabellione sint subscripta, eadem omnino habenda erit fides, quae huic haberetur, si ostenderetur. *Datum Romae apud S. Petrum, die quinto decimo mensis aprilis, anno Domini millesimo nonagesimo septuagesimo, Pontificatus Nostri septimo.*

ALOISIUS Card. TRAGLIA

*S. R. E. Cancellarius*

CAROLUS Card. CONFALONIERI

*S. Congr. pro Episcopis Praefectus*

Franciscus Tinello

*Apostolicam Cancellariam Regensloannes Calleri, Protonot. Apost.*

*Iosephus Del Ton, Protonot. Apost.*

---

\*A.A.S., vol. LXII (1970), n. 12, pp. 815-816 © Copyright 1970 - Libreria Editrice Vaticana

---

Copyright © Dicastero per la Comunicazione - Libreria Editrice Vaticana